

江西詩徵

江西詩徵卷十二

南城曾煥寶谷編輯

宋

黃符

符字信叔金谿人紹聖中進士讀書過目成誦父
慶基初欲以任子奏符願自試竟登第時初立宏
詞科又冠其選仕至秘書郎

黃華姑巖

鐵色陰嵯積石屯玉顏窈窕鎮崑崙上池降液行靈響左
角承雲出曉瞰手抉風雷穿月窟坐當星斗直天門昔人
政有懷仙地爲挹清泉注一尊

曾紆

紆字公衮南豐人布子以蔭補官入元祐黨籍紹興二年除直顯謨閣知衢州自號空青先生有集戲作冷語

萬山雲雪陰霾空千林霧濛水搖風凍河徹底連三冬嘉平曉獵嶠雨中十二律呂相與宮安得此候疎煩留

江槎軒書事

臥聽灘聲灑灑流冷風淒雨似深秋江邊石上烏桕樹一夜水長到梢頭

竹間嘉樹密扶疎異鄉物色似吾廬清曉開門出負水足可小舟來賣魚

宣州水西作

杖藜出郭一水近石磴古路穿松筠萬仞絕壁倚天末百折驚灘當寺門泉聲飛下錦繡谷殿影插入玻璃盆宣州水西天下勝聞州城南何足論

寧國道中

渡水穿橋一徑斜潦收溪足露汀沙半川雲影前山雨十里香風晚稻花異縣悲秋多客思豐年樂事屬田家故園正好不歸去滿眼西風吹鬢華

客愁

客愁如繭絲一攬成萬緒秋風不可奈又到庭前嚮秋風自有時客愁了無期不如飲美酒誦我山中詩

趙 賜

賜字又若本杭人紹聖中進士累官直龍圖閣提
舉江州太平觀過江寓信州玉山因家焉

奉和姚仲美蠟梅

陽和都未見芳菲初喜寒苞發故枝絕色負無朱粉態
香寧許燕鶯知凝愁金谷登樓日斂黛溫泉賜浴時寫作
新聲傳玉笛誰人持向月中吹

黃大臨

大臨字元明分寧人庭堅兄紹聖中龍泉令

黃菴詩寄魯直

手把齊民種時書莎衫臺笠事耘鋤夏栽醉竹公千箇在

蜚晨瓜滿百區早秣旋春嘗麴蘖新梁炊熟自樵蘇日西
杖屨行山口招得鄰丁作飲徒

黃叔達

叔達字知命分寧人庭堅弟

行次巫山宋楸宗遣騎送折花厨醞

攻許愁城終不開青州從事斬關來喚得巫山強項令折
花傾酒對陽臺

上南陵坡

風食水宿六千里蛇退猿啼百八盤上得坡來總歡喜摩
園依約見峯巒

題小猿叫驛

大猿叫罷小猿啼箚裏行人白晝迷惡藤牽頭石齧足嫗
牽兒隨淚陸續我亦下行莫啼哭

向子諲

子諲字伯恭臨江人敏中元孫欽聖憲肅皇后再
從姪元符初以恩補官高宗朝歷徽猷閣直學士
知平江府尋致仕號所居曰薌林

題王文孺臞菴

仙翁五十鬢猶青高卧柴門晝亦扃茅舍已忘鐘鼎夢蒲
輪休過薌蘿亭陰森門巷先生柳寂寞江天處土星晚歲
田間農事了閑鈔甯戚相牛經

題薌林

莫問清江與洛陽山林總是一般香
兩家地占西南勝可
是前人例姓楊

題米元暉橫軸

早爲山谷印可晚陪帝所清閑筆力休論扛鼎神功更解
移山

向日家居道士今朝碧落仙鄉胸次山高水遠筆端雲起
風狂

朱褒

褒字世德南豐人軾子元符三年進士歷官虔州
法曹屯田員外郎建炎初卒

和曾密公江樓詩韻

太史聲名重江樓昔有言詩清排屈宋意古挹羲軒飛棟
蒼雲合窺魚白羽翻臺高縈水府氣爽返梅魂市遠風埃
潔川映草木繁滄浪初出日瓠落可浮樽曲岬疎帆影枯
槎隱燒痕秋容天漠漠春意雨昏昏地易規模在碑新典
則存溪山重入座先哲豈虛論

汪藻

藻字彥章德興人崇寧二年進士高宗朝官兵部
侍郎兼侍講拜翰林學士出知外郡奪職居永州
卒以脩徽宗實錄功追贈端明殿學士有浮溪集
桃源行

祖龍門外神傳壁方士猶言仙可得東行欲與溪門親咫尺

尺蓬萊滄海隔那知平地有青雲只屬尋常避世人關中
日月空萬古花下山川長一身中原別後無消息聞說胡
塵因感昔誰教晉鼎判東西邵魏秦城限南北人間萬事
愈堪憐此地當時亦偶然何事區區漢天子種桃辛苦求
長年

避地西亭野步

今日幸無雨天空出遙岑行行不知疲遂至春江溇洑路
轉籬落人家在桑陰平疇漲清波隴麥如人深溝畎戲鳬
鶩新蒲映浮沈我生本樵漁對此諧初心風物豈不好悲
來自能任邊塵暗中原四海如驚禽黃屋狩萬里兩宮隔
晨昏龍移螭螭窺月晦蟾蜍侵宇宙有顛覆茲遊豈嘔欬

銷憂賴酒醪太息誰能斟

過臨平

一別九霄路風烟長滿衣已成身老大無復世輕肥天濶
鳥雙下山寒人獨歸曉來何處雨春水滿巖扉
睡起涼生岸鉤簾坐小窗麥風能起花梅雨不鳴江往事
心常折歸塗影自雙依然蒲柳地人老故先降

春日

一春畧無十日晴處處浮雲將雨行野田春水碧于鏡人
影渡傍鷗不驚桃花嫣然出籬笑似開未開最有情茅茨
烟暝客衣溼破夢午鷄啼一聲

題張資政汝川圖

澹巖書堂

昔人曾此結精廬故老猶傳井曰餘今代子房來卜築要
看圯上一編書

多寶院

每尋疎磬訪支郎苔竹交陰杖屨旁絲履甕巾聊取用風
流不減贊公房

金石臺

花光連接兩臺春中有眠雲跂石人莫使鞭笞鸞鳳去時
來重現宰官身

懷賢菴

履綦行處日蒼苔聲聲悅深藏月一開已辨此身同法喜不

應臨感更難裁

題江南春曉圖

忽從林杪見朝暉
釋嶠孤雲半欲飛
何惜扁舟并畫我
要從海際望春歸

題大年小景

忽驚坐上江天渺
半幅鵝溪寫霜曉
風低黃蘆潮欲到
半沙無人喧宿鳥
向來著眼應萬里
開卷尺餘那盡了
須知王孫寄筆力
平日氣吞雲夢小
故將點綴調兒輩
不待淋漓翻墨沼
滕王蛟螭往誰並
曹霸驪駒今已少
坐令好事費百金
窻几短屏橫軸繞
君家此本傳幾世
羈客見之先絕倒
江頭歷歷舊行處
好在魚磯落寒潦
浮家汎宅歸去

來還看飛鴻卧林杪

士人買妾旣而疾以詩戲之

但知瓊樹門清新不道三彭接有神處仲未聞開閣事維
摩空對問禪人封侯燕頤何妨瘦伐性蛾眉卻怕顰從此
空花掃除盡定須嚼蠟向橫陳

賦琴高魚

百川萃南州水族何磊砢其間琴高魚初未列楚些豈堪
陪薤鮮裁用當肴果土人私自珍千里事封裏遂令四方
傳噍囁亦云頗俗云琴高生控鯉宛溪左靈蹤散如烟遺
蠶尚餘賴向來騎鯨人逸駕嘗慕我不應當時遊反用此
么麼得無效齊諧怪者記之過彭越小如錢蹤跡由漢禍

越王載王餘變化更微瑣因知天地間人莫窮物夥區區
于其中臆決蓋不可僞真吾何知且用慰頤朶

郊邱書事

垠輿深出未央門十里園壇氣象尊珪璧三千周典備龜
貅百萬漢兵屯青城浮靄連霜動黃道微風帶日溫不用
靈光符聖武從來精稷荅乾坤

隆祐太后挽詞

慶源由魏國奉祀及宣仁盛德儀中壺私恩絕外親長秋
期不老厚夜忽無晨來歲柔桑綠誰臨蘭館春
湖漢遐征後南州倣擬時人心憂社稷天意歸簾帷擁佑
千齡主鬪回萬世基中興能事畢條與帝鄉期

題張公明賞晴軒

只將春睡賞春晴東坡詩也
取以名軒公明文定之孫

端居有何好名與勝會并人生豈長閒
天宇不屢晴邂逅風日佳一醉萬事輕
君家大父客詩如九韶鳴浮春散無垠
攬取造物驚坐令綠野堂岌嶮睢陽城
風流被三世諸郎未慙卿開軒著尊酒報
答千花明飲罷遣客休仰空看雲行是中
有佳處遑恤身後名寧爲秋雨歎更作秋
蟲聲

題伯禹給事漫吾亭

人生天地間同一幻泡影偶然相值過
便有人與境那知兩皆漫直寄彈指頃
古來賢達土物我均土梗程侯東南俊
自少忠義秉周旋正色地四海憚嚴冷
立朝二十年憤世欲生癭班雖近日月
志則在箕穎中年拂衣歸絕意向

江西詩集卷十二
鐘鼎擇幽成小築勝會已獨領清寒把湍瀨秀色攬諸嶺
聊將不羈身對此無餘景回首無溪老便覺加數等從渠
春風顛那得到古井高詞出胸臆妙處如灌頂讀罷眷攀
籠悠然發深省

徽州班春古巖寺呈諸僚友

撥日奉明詔班春出孤城和風遞鼓鼙細雨迷旆旌渺渺
度阡陌谿山照人明幽花不孤芳好鳥相應鳴隴麥已爭
秀畦英亦微萌食新知有期及我凋瘵氓古寺依絕壁林
端列飛甍殘僧四五人靜若無所營石室廣百肘嵌空自
天成泉甘與茶宜就挹巖下清伏檻肆遐矚歸雲入簷檻
數農前致辭貌野意則誠茲幸杜冠蓋使君豈無情頻年

苦饑虛奚用恤此生守昔在閭里先疇每躬耕起家三絕
餘謬添符竹榮無術布寬大低頭愧鰥惛願言同撫綏永
絕愁歎聲

阻溪漲宿諸暨縣上省院

暑寒倦行役依投得禪關空堂納清風坐見香霏還積水
共天遠高僧與雲閒傳聞扁舟人宿昔廬茲山姝者已千
載諸峯高煙鬟當時功名成止在談笑間今豈無國士宸
遊一何艱憑高望行朝小雨猶斑斑

病中偶成

衰病乃其理移牀臥南軒雖懷飲冰憂賴有清賞存春去
芳草積羅生滿庭萱花房向夕歛似與吾忘言數蝶亦多

態差差傍叢翻客來同一欣何必臨芳樽常恐秋節至嚴霜實其根吾生尚悠悠眷爾安足論

聚山閣爲吳氏題

緣江故多峰秀色無可據何須著脚力政欲長在眼詩翁築飛閣似恨山意懶縱橫數州碧收拾付酒醺客來何所命濯濯千髻縮晴嵐入肺腑寶唾落碑版翁家誠可樂人境雨蕭散爐香侶趺坐終日對編簡風流前輩接細說鬚自挽居然典刑在聽者輒忘返會須營一壑萬事等鵬鷁從翁時對榻臥看煙雨晚

寄余仲誠

千巖雪齊消煙日暖春事端憂味佳節獨宿松下步遶屋

泉雨鳴焚香戶深閉殘僧荷鋤出陶鳥下庭戲將期道心
復敢愜棲遁志起望君家雲風清鴈成字

汴中放船歸陽羨

流斯欲作環珮鳴枯木未肯回春聲舟人坐恐雪爲祟嬌
鵝又舞天邊城天公知我不足厄乞與十日霜風晴遙遙
煙堤護玉鏡泚泚雲海浮金鉦攬衣坐數踵間息闌見宇
宙無餘情燈花也似調兒女咄咄笑我長宵征我生底處
不堪著未歸且雜吳兒耕縱無鄰翁飲子美會有稚子迎
淵明仙山况聞連洞壑餌木或可求長生閒中日月吾所
有此外付之人重輕

從人乞酒

張侯表表霜松立嗜酒清狂如故習長年種秫學淵明門
外溪流和月汲手調溪上百花乳十日煉成冰雪汁糟牀
夜聽秋雨注詩腸曉放春風入飽聞誇說未曾見但笑書
生便飲濕爾來消渴臥江海更似枯魚過河泣傾家餉客
古人事坐看兵廚千斛給那知日飲無骨相咫尺公榮殊
不及西風昨夜到林杪左手蟹螯行可執新醅早晚定堪
斟凍蟻浮缸應戢戢心知問字寂寥久會遣鳴鞭馳送急
呼兒洗盞酌先酒爲君快作長鯨吸

喜江發之見訪并簡婺源江明府

怪底青燈綴玉蟲忽傳車馬到溪東鳥聲應爲故人好梨
雪欲將春事空老夫淵明三徑在病來彌勒一龕同總持

相見問生死爲報百憂如夢中

醉書

尊前和雨唱陽關紅燭熒熒照夜闌酒醒夢回山月小水雲無際鴈聲寒

卽事

燕子將雛語夏深綠槐庭院不多陰西窗一雨無人見展盡芭蕉數尺心

雙鷺能忙翻白雪平疇許遠漲清波鉤簾百頃風煙上臥看青雲載雨過

次韻何子應七月十八日書事

寄語江鷗莫浪猜先生愛汝水滌涸自從楚國靈均後幾

箇騷人到此來

臥看山色懶扶輿擬櫂扁舟學釣魚誰似湘流知我意秋
來三得道州書

古鏡行

我有辟邪鏡得之咸陽宮其陰爲天池一母將九龍旁書
負圖字土蝕如旋蟲緘以駭雞珍妙極倕之工請言照遠
近十里秋毫空豈不鑒脂澤所貴肝膽通問誰爲此器太
古非人功客聞重歎息意欲窺靈蹤高臺不辭倚恐客難
稱容繩窮匣半啓四室來悲風日車當晝甯羞澁如頑銅
森然髮上指凜若臨霜鋒我還撫客手此豈世寶同揮淚
兩無言掩鏡盤囊中

宿焦山方丈

明發理烟艇，歡言濟遙岑。盤渦沸風雨，稍辨鐘磬音。行行
並疎柳，迎客多幽禽。扶輿上犂硯，始見江湖深。臺殿明海
色，嵌空憶龍吟。修廊延客步，妙香慰人心。遐眺未云極，千
巖忽秋陰。孤月欲生嶺，諸天悉浮金。茲遊信奇絕，況接支
道林。夜語不知旦，虛窻對橫參。人閒驚毫末，物外雄窺臨。
稽首悟真理，微生安所任。蒼崖有奇字，霜乾約重尋。

同張昌時宿高明寺

幽卧不知覺，窻懸寒日初。矧伊夜來雨，谿聲到吾廬。故人
挽我出，忽枉天際書。躋險敢自休，青山轉籃輿。相逢竹間
寺，共擷園中蔬。殘僧誰在亡，奄忽十載餘。茗果話疇昔，新

晴報鐘魚東雷亦已鳴百草茁穎舒奈何與之子齒髮日
夜疎眷此不能發牽衣更踟躕明朝各回首世事將焉如

次高郵軍

小雨靜林麓鶉鴝相應鳴移舟漾清深薄晚荷氣生歸鳥
盡雙去潛魚時一驚菰蒲若無人渺渺炊煙橫艇子檝迎
我攜魚薦南京月出殊未高疎林隱微明依沒會有處斗
掛天邊城

阻風雨辟邪渡寄王仲成

渡頭急雨鳴森木木杪顛風飛大屋沒腰寒水稻生芽滿
眼青泥車折軸山行值雨舟值風窮愁日日煩天公不如
歸卧澗壑底世事不埽春煙空別君兩年重此別喜君暫

次渾冰雪擬將身作賈胡留無奈事如空鳥滅挽我不回
君怒噴交情把玩轉清新相隨百里還相見只有西山似
故人

庚午歲屏居零陵七月二十日以門揜候蟲秋爲韻
賦五首

幽人獨夜時潮落西川根渡口櫓聲急一江煙雨昏城頭
短長更不寐聽譙門跌坐數千息焚香待朝暾

暑退潦亦收瀟湘淨如染時觀自跳魚衝破青琬琰纖纖
初弦月不受薄雲揜近村應漸寒已有鴉數點

人生幾聰明日夜隙駒驟纔經花信風又過麥秋候吾非
金石堅與世相邂逅胡爲聞鐘鳴更歷路傍埃

家山在何許渺渺彭蠡東人來數月程衣敝補道中昨宵
青燈花似墜釵頭蟲兒饑女沉綿歲晚書未通

人言閒闊者一日如三秋孤臣昔放逐七見天星周早滂
高門地姓名記前旒如何天鷄星不照湘南州

次韻向君受感秋

且欲相隨苜蓿盤不須多問沐猴冠菊花有意浮杯酒桐
葉無聲下井闌千里江山漁笛晚十年燈火客羶寒男兒
幾許功名事華髮催人不少寬

向侯挂笏意千里肯爲俗彈頭上冠何時盛之青瑣闥沙
語付以烏絲闌日邊人去雁行斷江上秋高楓葉寒向來
叔度儼公是一見使我窮愁寬

壽寧川驛壁

過眼空花一餉休坐狂猶得佐名州雖遭龍吏嗤韓子却
喜溪神識柳侯盡日野田行穉稷有時雲嶠聽鉤輅會將
新濯滄浪足踏遍千巖萬壑秋

宿鄧侯鎮

當時踏月此長亭髻似河堤柳色青今日重來堤樹老一
簪華髮戴寒星

微涼初破候蟲秋露草螢光已不流搔首與誰論往事星
河無語下城頭

過吳明叟新居

誰開大屋沉沉者門外垂楊拂車馬主人四十持節歸高

卧綠陰啼鳥下冥冥一徑傍花入忽有青池照深夏魚吹
落日知鏡淨荷受微風看珠瀉夫君少有湖海氣手掣長
鯨無地跨故將能事驚世人坐向雲端差萬瓦稍培幽桂
出窻底時放青山來竹罇人言此興極不淺天遣公忙那
肯救要須更作輞川圖他日思歸聊對畫

晚發吳城山

風掃陽侯雪陣平雨催摩詰畫圖成氣吞浦溆重林盡秋
著江湖去鳥明厚祿故人無一字長年三老伴餘生會須
滿意開懷抱到眼廬山不世情

已酉亂後寄常州使君姪

汾水遊仍遠瑤池宴未歸航遷新廟主矢及近臣衣塞馬

宛天塹邊烽斷日幾百年還海地回首忽成非

龜山上方

度險逢幽處憑誰寫壯懷連甍棲絕壁孤塔表長淮地本
吳楓接山今禹績皆潮聲從殷寺竹影自翻堦木杪朱欄
出城坳雪浪埋乾坤迷枉渚霧雨泄陰崖丹葉經寒在蒼
洲向晚佳魚龍宵聽唄猿鳥晝窺齋月滿嶺珠寶霜清磬
石諧僧盂收栢子樵徑掃松釵左宦書無鴈南京菜有鮓
風煙欺短髮雲水信殘骸竟作何鄉老虛慚素尚乖江湖
今在眼歸合辦青鞋

醉別季高侍郎

疇昔追隨翰墨場功名今日愧劉郎英姿合上凌煙閣巧

諧會遇偃月堂雙槩又乘清夜去一樽聊發少年狂歸來却共燈花語騎省看成滿鏡霜

蔡天任韻

脩廊過午夕陰合蝴蝶滿庭春草長呼兒更捲簾數尺要放晚晴升屋梁

曾開

開字天遊贛縣人準子幾之叔兄崇寧二年進士歷官權中書舍人建炎初累遷禮部侍郎兼直學士院忤秦檜出知徽州卒

李伯紀丞相挽詩

先帝收多士惟公發妙年清班依日月讜論薄雲天終賴

高名重來扶大業全誰提太史筆臣主頌俱賢
太上初傳祥安危俛仰間從容回萬乘指顧復三關漠北
塵沙迴閩中日月閑誰知千載後遺恨在燕山
追數中興相公居第一人初期從北狩寧料久南巡此日
勞明主他年憶舊臣東都朝萬國不復見簪紳
一別睢陽後風霜十五年勞生俱老矣流涕獨潸然丹鼎
秋來就心燈半夜傳定應真不死歸卧白雲邊

王 案

案字輔道一字道輔德安人韶子崇寧中進士官
校書郎翰林學士兵部侍郎宣和中以左道爲林
靈素所陷棄市

同劉元靜遊嵩山峻極中院作

爛紅一點出浮漚夜坐嵩峯頂上頭笑對僧窻談祖德當年七十四回遊

浪花

一江秋水浸寒空漁笛無端弄晚風萬里波心誰折得夕陽影裏碎殘紅

張 擴

擴字彥實一字子微德與人崇寧中進士官秘書校書郎充館職南渡後爲中書舍人有東窗集

次韻大年姪見贈古詩

人生幾何時心也要平曠不須意外求辛苦尋詩暫此郎

有高處智出百天上禪窗接輓語眉宇春盎盎詩壇久失
律齋戒欲謀將誰專筆陣功定起太公望

君文秋水篇曲士羞臆度吾文元尚白窮老甘寂寞向來
失宗盟士氣日卑弱後生苗未秀况復病草惡如君真挺
特文字獸一角頭風吾何憂解后當勿藥

次韻周嘉仲刑曹簡航師食筍

籊龍叅不得託根暫神奇忽化清淨供結緣貪導師回甘
溢齒頰常帶泉石滋要知服食功不減瓊田芝

此君淡難交挺挺如立玉何意昆仍中爲人償口腹羣嬰
脫錦褕珍勝饈項肉猶堪作味諫沒齒蠲脂毒

長櫬太寡恩斷喪東南美至今管城封濫罰及孱子例求

一赦貨餘潤乞松髓周旋南董手罵賊到盧杞
周郎清而臞菜把助嚴苦槃中玉離離醞釀冰雪語向來
幾詩亡徑欲就君補請讀食筍篇微言皆可咀

送次公姪從辟顏拱衛軍中

結髮事師友投身翰墨場技成忽棄去短衣親戎行平生
萬卷書豈無活國方不如日擊賊對面用所長顏侯將家
種勇過王鐵槍蝨弧每先登裂袂裹箭創得君如敵國辟
易未易當中原干戈滿乘國藉棟梁誰專發蹤策坐待錐
脫囊事平各分功干級歉莫償位卑君勿言儒雅故自將
曾從儼籍中微見被敵草

讀試卷有感

巧言互一律紛然如錯鋒揮筆餘萬言積案成千重誰令
繆悠子持衡居其中兩目病且昏不辨牛馬蹤而使視試
文豈能分雌雄往時心力強眼明耳猶聰本欲藉科舉脫
此文字攻一朝反自縛身隨蠹書蟲負郭有田園猶存荒
菊叢頻年秔稻熟酒賤尊不空胡不駕柴車遠揖陶令風
作詩請伯氏林下相追從

次韻何任叟正字館中試茶

金柈猥稱櫝椰珍藿食未辨汗吾脣茶丁妙寫犀鈐真排
方似欲驕華紳爲君走碾颺微塵羊腸聲乾行隻輪柘羅
栽絹素縷勻箔絲巧織霜後筠中貯刀圭護百神乳花初
幻人間春計君別品尚絕倫完璧不受敵國嗔白虹夜氣

千秋旻把玩自覺舌生津天衢小草搜八垠蒙山顧渚亦
懷新香歇色壞非法身妖星森索避北辰不須會粹權羣
臣龍翔鳳翥登嚴宸向來策勲自有人君其問諸修水濱
顧景蕃訪大年姪昆仲留宿細柳軒夜論詩律輒及
老朽大年作篇調景蕃末章見稱過實且欲盡借拙
詩因次其韻爲謝

平生不依南路徐斗升寄活真魚濡了知浮名誰得喪定
自有數相乘除竭來雲外澗壑底槁項不減霜松臞里中
能詩二三友安步過我毋庸車要須文字賞雌霓未暇詠
誰翻奴聞談天坐聽落鏃廚蹇步那敢爭先驅願侯風味
更巖苦家貧闕辦二韭並過腸撐突五千卷底用自粹箋

蟲魚文如楚寶醉後藁下筆應得銀盆剡近聞畫犯細柳
煙酒闌罷歌却驪駒未妨仲子工料理珠琲餞歸懷不虛
惡當展緘疾讀時新飈策策驚籬篠主人韻高絕少可容
亦未易折簡呼末章字字關老朽愛我如愛屋上烏吾家
兄弟俱人傑飽聞石氏多珊瑚莫云癡叔良不癡久諱筆
硯陪樵蘇諸郎胷中氣吐霧咳唾自可回春枯少年得譽
似劇勃他日不愧先楊盧儻見惡詩幸掩覆人所罵譏鬼
瑯掄

大年復用前韻賦詩見贈亦次韻答之

蠲龍停邊天步徐酒薄肉乾唇不濡漫郎憐我困蒸溽爲
送古風專掃除山頭逢君日乍午作詩瘦似仙人臞展緘

初疑走甘露熟讀政似鏘鸞車世間癡兒浪搖吻談空說
有天一隅我今冥頑老不入十年此路空馳驅邇來病廢
關菜裏枵腹日厭葵菽菹窗間敗毫積霜笥架上蠹帙繁
書魚錢神無耳未易使斗宿不靈那可刺誰門有士料理
得隨地駟駿吾家駒三珠連樹價亡敵一鶚掣韝名不虛
近聞掃徑避裨暑竹枝青鞋一簔條枕中邯鄲夢不到戶
外孔賓渠自呼讀書瀾翻惜晝短幾欲挽斷三足烏鼎來
說詩劇有味令我坐享商之瑚斯文所善未中絕五字復
見李與蘇遺音當從牛鐸證廢律安取焦桐枯亦知大國
功九合一時盟會收微虛願持狗尾彊貂續未妨舉手遭
擲掄

謝人送炭

竈煙茶毗霜後林短椽脫煙烏不黔樵童豈惜龜兩手入市論價輕千金向來幾作溝中斷漫滅青黃誰過眼焉知負荷鑪錘功煨燼猶堪借餘暖夜闌吼空風力豪平明雪山平屋高生柴帶葉冷不燄毀車充薪車脚勞故人十縛起衰朽生遣塞灰撥紅獸解衣挾纊不足云那復區區論炙手

悼次東提刑姪

彊學初無敵臨民早有聲暮年猶補郡餘事及談兵慷慨聞高誼艱難見老成蓋棺今已矣百世漫空名妙手剗百節劇談翻九河人皆期晚用君更患才多世路

方榛棘人豪正網羅重泉無日起天意定如何

次韻呂居仁主簿過韓存中侍郎所居

文章典雅如班固人物風流似謝安老去漫餘公論在退
休渾覺壯心闌松窗有月和書照雲物無羶禦客寒冷淡
且尋詩作話要看雷電勅僊官

送喻廸孺郎中知遂寧府

平時場屋漫聲名晚下瞿唐信此生萬里不應頻去國一
麾聊復爲專城送春杯酒侵行色上峽山家慰客情坐遣
官曹頓半落說詩誰復似匡衡

咏會徽言端硯

吾家文房珍尤者一一數端溪從誰得不記歲月古中窪

削天成外鑿餘雷斧向來在葦中險作百辟補

吳則禮

則禮字子副富川人以父御史中復蔭入仕崇寧
中官至直秘閣知虢州晚居豫章號北湖居士有
北湖集

春事

春事豈堪論桃花遽如許薄暮短牆頭已作迴風舞
翛然斷經過睡足南窗雨幽夢與誰言迢迢墮三楚

良辰

良辰入奇懷端欲挽我行幽花迎人笑欣然媚柴荆
春醪處處佳姑瀉濁與清好鳥何許來日暮獨一鳴
江山雨新

洗坐使老眼明天公暗鵲鳴要作爛漫晴平生木上坐莫
逆惟有卿歸尋茅三間遙取鳥几憑長腰雪不如付茲腹
彭亨短蔬勝肥肉甘哉北湖羹一飽便可足此外豈所營
莫語兒子輩吾儕寧要名

寄歐陽元老

耿耿坐不寐浩歌睇流雲寒商動清夜落木何紛紛幽閨
納華月宴几停餘薰聊復飲蘭露無因持寄君

朱涇寺

冀馬日馳突無地制奔放來爭天東南束手莫與抗我航
指四百里之迷所向十里望雲屋遠意局寬間尺五趾步
天丈六歡喜相更參船子師稽首問無恙平生客江湖半

世狎煙浪漁監選常登釣尹職不曠此手誤遮日久矣豈
塵妄願師賜金篦試與開眼障

移菊

愛此秋氣涼捐書坐北戶黃花手自栽開花忽無數朔風
吹寒雲色映茅簷暮起立竹幽香泥衣有零露旋移霜中
花娛此羈旅人白髮圖一笑天公初不嗔平生飽參鼻宿
昔應供身老大無所著幽花如絕倫勝處那可已聊復運
意根漉彼汁滓酒澆茲葵莧唇憑君辭好語與招江湖魂
端欲道逸想緬焉難具論

贈江器博

先生行年今七十植杖端如孤鶴立江天小雨作許奇洲

渚橫斜鴈行濕先生隸法老更精未要中郎作典刑筆含
鍾鼎小篆意破齒要須斯與冰先生宿昔愛琴音不愛越
琴愛雷琴摩挲龜背蛇蚶紋太和欵識尤絕倫先生真已
棄百事舊參堯典舜典字端有江湖著老儒笑大耳兒長
結毗學書初不論永和書到石鼓才不磨不見吏部石鼓
歌往載安得數駱駝

贈子發

金銅仙人辭漢歌近時作者嗟誰何王侯之種合瑰詭君
復岸高智塊磊著身邱壑謝幼與此事端憐卿輩無口譚
名墜腳穿屐手提毛錐家四壁平生三尺古錦囊掉頭不
愛尚書郎他知得句要得眼肯道挽弓須挽強老夫天與

羈臣骨大笑癡兒曾咄咄折牀舊喜存烏皮渴金初欣識
黔突未辦澆渠酒一樽藜藿且可細論文政思橫說與豎
說莫廢本來微妙舌

次韻林初心先輩

太史滯周南醇儒去廣川功名欺白髮風雨送流年故國
悲歌裏滄州醉夢邊平生心似鐵相對肯淒然

登北樓

落景孤雲共清商戍角和蒼煙澹伊洛白露濕關河牧馬
隨鴻雁行人挈駱駝暮年餘習在猶欲聽邊歌

神堂道中聽後騎短笛妙甚而花柳已有思澗流澣
澣可喜

從來十八拍笛裏更清新著處是淺笑可人惟晚春未收
紅簌簌且揭碧鱗鱗小雨爲我止鶉鴒長自馴

不奈

不奈淮南熱遙知秋可憐烏皮垂老事白髮半生禪井水
從兒汲茶鐺且自煎何時決明好堂下晚花鮮

送公桓行

汾河水落雁南飛一馬蕭蕭木脫時蒼鬢寧堪異鄉別幽
人況有故園悲山頭日沒邊笳斷隴底馳鳴塞草衰千里
黃雲太行路自憐北望獨相思

送王詩客莊依湖外使者

問舍求田話昔時共憂南北未安枝青山笑我空成夢白

髮憐君苦作詩風月誰教太瀟灑功名自是小差池要須
附驥還金馬畫錦歸來亦未遲

送陳潛時權師還自靜州

漢節亭亭晻霭間邦人多看錦鵬還初傳使者驅千騎俄
見將軍定百蠻雲盡月光依組練雪消春信滿湖山佇聞
禁掖催頗牧玉陛歸親咫尺顏

寄魏道輔

漠漠長煙暝戍樓登臨永日強消憂殊方日落青山暮舊
國雲深碧樹秋向老江湖雙病眼此身天地一浮鷗高談
早晚對犀塵滾滾遙憐湘漢流

憶昨呈元老

憶昨參戎幕交情子獨真共爲關塞客各負水雲身跡遠
金閨籍衣沾玉壘塵雕鞍暮橫槩錦屋曉行春隱几軍書
斷登樓隴月新鳴笳孤障底落雁古河濱魯酒寒醅薄燕
姬翠黛頻沙場供寫睇戎角解傷神白首投南國青冥望
北辰山林方自屏雞黍復相親道舊嗟遊楚論文偉過秦
高標識麟鳳壯節見松筠陋巷無車轍扁舟有釣綸悲秋
把黃菊取酒墮烏巾藜藿良易足圖書端不貧一廛如可
借煩爲闢荆榛

次公卷韻

故人已去遂飛蓬醉墨新辭手自封欲識暮年魂斷處從
今不忍聽霜鐘

絕句

滿船買了洞庭柑
雪色新裁白苧衫
喚得吳姬同一醉
春風相送過江南

李 憇

憇字去言建昌人常猶子

春晚

花瘦烟羸可奈何
不關渠事鳥聲和
無人掃地驚殘夢
分付輕紅上碧莎

李先輔

先輔廬陵人崇寧大觀間有詩名

題朱陵洞水簾

一片挂蒼崖分明不惹埃蹙成珠顆白垂下水簾來野燕
飛難入山風卷不開聲聲去朝海無意戀巖隈

劉才邵

才邵字美中號櫟溪居士廬陵人大觀二年上舍
釋褐宣和初中宏詞科紹興中官工部侍郎權吏
部尚書時秦檜方用事雍容遜避以保名節丐歸
奉祠卒於家贈顯謨閣直學士有櫟溪居士集一

次韻劉克強寄劉齊莊并見寄

吾宗富清製學海無滄湄洪濤駕三山逸興不可羈抱此
未護騁造化真小兒邇來二十年姦諛取世資曷爲志氣
滿鸞翮戢固宜皎皎空谷姿誰復詠來思上天旣悔禍威

命方馳騁遠裔復千紀危塗動噫嘻我生落世紛備嘗憂
與疑敵帳如鬼國漂墮驚渺瀰蒼蒼安可問泯然空自知
脫身垂涎口生死爭一釐事機如電轉由來難逆推況當
艱危際志願常參差小已安足念身世久已遺但有區區
心痛憤難伸眉知公愛我厚怪我色不移新詩沃煩襟勝
彼白玉卮天葩輕組繡清芬吐鮮奇復如遊元圃紫鸞雜
文螭雲煙忽中斷宛虹露長髯驚歎方未已復歌清遠詞
南溟雄絕境句中得潛窺想當白日晝微風皺琉璃寫作
冷然音聽者自忘疲顧我才學短頗似臨江麋居然羨兩
驥蹇步何由追因念玉川子茅屋無藩籬搜腸五千卷不
救寒與飢弄筆頗驚衆取謗祇自底閉門烹月團籠頭帽

斜欹險語已絕俗憂世良可師公詩足高韻千載若同時
思得素濤既一洗中腸悲飄然遊八極遊球娥與義封題
幸早寄佇看清風隨蓬萊見羣仙爲誦玉川詩羣仙司下
土聞此應忸怩却須問人世徐徐說津涯上言天子聖盛
德方應期下言蒼生苦梗莽須平治他官地位多主者當
爲誰願速掃姦孽不復煩靈旗神京朝萬國復見漢官儀
歸來頌中典當才勿吾欺

次韻周秀寔贈王自然

隱者逃世網遂欲安一枝不能負猿鶴山林無返時吾人
富道義詞華振芳蕤共疑斂遐步不願黃金羈然於論議
間憂國不顧私豈從隱者徒揭掛荆棘茨願難同羣碎輕

屈邁往姿何當副仄席執簡上玉墀一薦危苦語自結明
主知良藥起民瘼神膏除國疵不同鄭子真虛名動京師
遊天竺靈隱寺詩

清晨出城西車馬紛颯沓行行巖壑深漠漠霧雨雜雲陰
忽披豁海色共蕭颼幽尋浩莫窮空響時相答地籟笙竽
真林纈丹青合潦收猿澗淨寺遶驚峰匝簷牙向空啄殿
脚依山插空翠撲軒窗乳洞蔽閭闔泄雲無定姿歛石半
栢毳珠燈吐光焰香龍振鱗甲啼烟禽念佛掇藁蜂供蠟
丹砂漲靈泉崑松披艾衲蘿徑勞躋攀風扉自開闔龍天
想奔奏飛走亦馴狎同遊今淵雲馳聲久韉鞞逸驥誰能
追流風不受聞家山富岷峨水驛經夔峽不應得未曾猶

若濟所乏欲去還停騶就石屢移榻共笑香積供未脫腐
儒羈重來當一洗尋盟忽忘歎

湘夫人歌

湘山影落重湖中中有蘭閣臨珠宮霞衣蘭佩雜香風蓮
旗閃閃拖晴虹朱絃斐怨指法鬆綠煙洗盡山重重湘雲
遠與蒼梧通騰空宛轉如遊龍雲中弟子謁重瞳寶車倏
忽穿遙空

相思曲

長相思懷百憂誰憐方寸間常貯一掬愁年華
若何心兮長遠遊菱花炯炯垂鸞額懶學宮梅勻膩雪風
吹涼鬢影蕭蕭一抹疎雲對斜月紅樓曲檻菱花高秋色

滿空風更酸，問征鴻。今倩爾傳素書，歲將闌。今君早還，何時失喜，聽嘶馬相迎，小立珠簾下。

清夜曲

紅藍衫薄，香玉春翠鬢，鬢盤鬆。雲門前溪水空，粼粼鯉素不傳嬌翠。翠窗紗，澹月寒光薄。冉冉暮愁無處著。龜屏掩恨，玉痕垂井桐，葉墮青鸞啼。

遊風穴

清曉意不愜，驅車向城東。行行歷谿谷，遂到青蓮宮。古塔跨虛碧，長橋臥晴虹。水落見谿骨，雲開露秋容。疎竹搖晚翠，寒花綴幽叢。訪古但邱壑，令人氣填胸。登覽未覺久，山遮半輪紅。白煙生汝水，橫空正濛濛。緬懷道化盛，山高水

無窮坐令千萬世矯首希高蹤浙江黃面子應識開禪宗
妙哉鐵牛機誰敢當共鋒杖林山下竹依舊金沙灘頭人
已空可憐高坐寂寥久蕭蕭古木號悲風

夜夢一道人見訪相與語甚久頗及宗乘中事因戲
之曰仙家亦學佛耶其人笑曰仙佛豈有二哉覺而
異之作詩紀其事

北風吹雲蕭天宇蕙帳寒生月當戶頽然就枕睡思濃魂
夢悠悠迷處所仙宮勝士肯見臨促席從容陪軟語自言
本事清虛君學佛求仙兩無阻雲嶠白日降遙空天衣飄
飄袖輕舉方諸宮深雲海闊金碧禪房隔烟雨與君粗有
香火緣聊復東來相勞苦方蓬崑崙還無期君住世間須

善爲塵勞足厭不須厭等是實相夫何疑前身自是塵外
人端爲世緣縻此身重聞妙語發深省若更離塵佛亦塵
方平羽節何時來道宮佛廟隨烟埃未須苦說揚塵事東
海波聲正似雷

霽虹亭

江流滾滾青於藍山如陣馬方趲趲景趣雖從開闢有登
覽正賴人謀參濟川亭古傷險狹石岸缺落呈欹嵌可憐
眼界方冗雜風月爲之久不堪使君才高蘊機鑒妙思能
發神所緘異時一見已經意施設先後難相攙政成將去
覲丹闕一新棟宇何耽耽就增亭閣跨空闊徑從人境超
塵凡波光挾日動飛拱簷影窺江陵過帆欄危更覺明月

近浪湧正值秋風酣螺峰晚靄助遙碧鷺渚歸翼穿晴嵐
東望青原森欲動祖意豈復勞窮探夜深定有水仙集霓
裳練輓垂毵毵雲烟態度日夕異詞客賦詠勞彫劉公歸
指日登華要雍容鳴玉橫犀簪湖山高會駐清賞尚應回
首江之南

貢士張智觀登禾山白雲峰絕頂愛其清曠乃結菴
辟穀凡十年後遂落髮法名永元紹興三年夏訪予
於城中具道所以出家及携詩東遊之意因作是詩
以餞

白雲山人機鑒高了見萬法棲秋毫龜腸蟬腹耐清苦空
山坐聽鷗鷺號無心索價驚衆耳尚恐名出終難逃一朝

解去薜蘿服鬢剔須髮披方袍黃龍宗旨人難奏涓滴不
容消息漏一到禾山謁老方全機不露三關透城中軍馬
正紛紛紅塵漲空日色瘦問師觸熱有底忙云向疎山聊
宿雨蒐奇獵怪窮端倪詩膽大於身數圍勿憂平淡少人
愛此去定逢韓退之年來世味種種薄文字習氣黏如糲
自信文通才未盡猶堪重擬碧雲詩

靈壁石

堅脆殊形俱是幻要當盡付空花觀其餘空色兩非真習
氣從他不須斷靈壁磬材如黑玉歲久取多岸爲谷問君
何從得堅質數尺嶽嶽心賞足新詩俊如霜鶻拳攬取物
象神機圓援毫一揮不停手巖壑意態何森然如聞駛舟

行日近不得隨舟無少恨夜敲清響哦新詩定有水仙簾
外聽

次韻送盧汝舟

秋鴻社燕若爲情岐路東西亦可驚入夜朔風搖畫角滿
空星斗罩高城吳江浪闊兼天湧楚塞山長盡日橫記取
別筵看劍處怕聽庭樹曉雞聲

詠竹

護惜龍孫意正勤風漪誰愛織成紋林中莫著山王輩擬
向他時詠五君

映日梅

冰肌耐熱本神人肯與寒光便淺鬢應笑海棠無道骨睡

紅快翠不禁春

鄭建古

建古貴溪人大觀三年進士

對菊懷陸子靜

落落薌城二老翁
白鬚遙映菊英中
交成晚節人彌淡
吟到寒花句亦工
灌溉已欣分綺色
扶持還藉挹芳叢
吾徒素愛凌霜質
相對應知臭味同

晏敦復

敦復字景初新喻人
殊曾孫大觀三年進士
高宗朝累官權吏部尚書
兼江淮等路經制使以寶文閣學士出知衢州
提舉亳州明道宮封臨淄侯卒

題梵隱院方丈梅

亞櫺傾簷一古梅幾番有意喚春回
吹香自許仙人下照影還容高士來
月射寒光侵礪戶風搖翠色鎖階苔
遊蜂野蜨休相顧本性由來不染埃

張叔夜

叔夜字稽仲永豐人大觀三年以開封少尹試制
誥賜進士官至僉書樞密院提舉南道兵金師再
至從欽宗至白溝河扼吭而卒贈開府儀同三司
諡忠文賜廟曰旌忠按宋史本傳叔夜開封人明
一統志宋名臣言行錄皆以
爲永豐人攷朱子旌忠愍節廟碑曰其祠墓在永
豐靈鷲山可據蓋叔夜爲張耒曾孫耒子利一
知信州軍遂
家永豐也

寄題靖安呂延平釣亭

豫章富人物歷數煩僕指先生釣璜孫盛德邈相似却顧
徐洪輩瑱瑱詎足紀修竹照清漪邂逅聊復爾吾君邁周
文未省獵渭水矧此江之湄相距數千里會遇倘有時必
爲蒼生起

趙士躬

一作仍

士躬字誠甫鉛山人宋宗室勤學篤行大觀間鎖
試第一歷官通判臨安提舉淮東有治聲紹興末
爲宗官卒諡文安

贈申孝子

鉛山乃靈山號爲七寶庫有時地愛寶人傑時一付禮闈

較文章發爲性仁賦盛美固不絕且作忠孝路時凶盜賊
多熾焰不容捕長驅斬關來提揮遠相訴申生本醫家首
衝衆賊怒有子趨而前悲泣溼衣褲願代父之死三刀色
不怖賊曰汝子孝解衣襯血汗以此兩全生父子歡如故
何不上明君表旌當金鑄

韓駒

駒字子蒼陵陽人政和初以獻頌補將仕郎召試
舍人院賜進士出身除秘書省正字坐蘇氏黨出知
州縣尋復召爲著作郎撰樂章兼修國史權直學
士院高宗初知江州致仕寓居臨川卒
陽羨葛亞卿爲海陵尉作薺春軒余爲賦之

昔聞先生隱吳儂常窗十里橫烟峰今見先生爲楚吏繞
牆四面縈烟水從來楚俗帶吳風曲折徑路深房櫳舍前
繫船柳千丈舍後叅天竹萬叢牙籤插架似蓬館白拂挂
壁如僧宮掃地焚香欣客至羹魚飯稻愁樽空不潤不淸
惟寂寞大笑先生致身錯青山猶作布衣心朱門却有田
居樂筆回造化天工怒胸包今古時人愕甘窮自許元次
山蹈海還尋魯仲連吾曹一歡豈易得世間百歲俱可憐
何用北窗翻巧策且向東亭弄春色我當酌酒壽主人灘
前飛下雙灘鶴

梅花絕句

雲根細路遶溪斜日出烟銷水見沙只度關山魂已斷可

須疎雨濕梅花

卽席送呂居仁

一樽相屬兩華顛
落日臨分更泣然
蹀躞鳴珂君得路
伶俜散策我歸田
近聞南國生涯盡
厭見西江殺氣纏
欲買扁舟吳越去
看山看水樂餘年

答蔡伯世食筍

尊榮化鹽豉
槐葉資新麵
豈知苦竹萌
風味常獨擅
昔我居錦城
屢喫田家飯
扶杖自入簪
纓此犢角
蘭後叅鶴林
禪餽我柔門饌
蒸蒸沸鼎中
亂下白玉片
惟無它物乘
始覺眞味現
三年客東都
錦籜寧復見
千金洛陽來
惟充大臣膳
前時過君食
欣逢故人面
那知列仙臞
已雜蒯通雋

吾寧飽甘肥憤叱那忍嚙請歸謂主孟厨人後當諫苦荳
雜嘉蔬沈香和甲煎柯亭旣誤椽畫鄣或遭練古來可歎
事千載寄明辨作詩弔韓龍助子當食歎

謝錢珣仲惠高麗墨

王卿贈我三韓紙白若截肪光照几錢侯繼贈朝鮮墨黑
如點漆光如水舊傳續溪多老松奚起旣死松亦空易水
良工近名世珍才始不歸潘翁蕭然南堂一居士赤管隄
麋無月賜借問元圭何自來去年海中持節使明窗晏坐
不恩恩引紙磨墨寒生風自笑平生縮蛇蚓更慚爾雅注
魚蟲殷勤二物從來遠裨海環瀛眼中見若欲揮寫藏名
山不如却作談天衍

分寧大竹取爲酒樽短脰寬大腹可容二升而漆其
外戲爲短歌

此君少日青而臞爾來黑肥如瓠壺縮肩短帽壓兩耳無
乃戲學騶侏儒人言腹大中何有不獨容君更容酒未須
常要託後車滑稽且作先生友少陵匏樽安在哉次山石
臼空飛埃茅簷對客夜驚笑麴生叩門何自來老向人間
不稱意但覺淵明酒多味乞取田家老瓦盆伴我年年竹
根醉

順老寄菜花乾戲作長句

道人禪餘自鉏菜小摘黃花日中曬峨嵋榘脯久不來麴
糵薑絲典刑在封題寄我紙作囊中有巴蜀齋厨香起炊

曉餽八月白配此春盤一拘黃

稌軟木耳八月白稻名也

次韻兼簡李道夫

麥秋宜晚起況復雨頻頻桃竹猶能杖柴車未可嘲閨分
酒賢聖靜記藥君臣會有騎鯨李來陪賀季真

次韻參寥

此身不擬墮塵緣長恐驚鴻落響弦
蹋盡世間千澗壑歸來曾次一山川
深宮木末猶秋色故國天涯只暮烟
憑仗道人分石甃要看庭下玉龍旋

夜泊寧陵

汴水日馳三百里扁舟東下便開帆
旦辭杞國風微北夜泊寧陵月正南
老樹挾霜鳴窸窣寒花垂露落穉穉然

不悟身何處水色天光共蔚藍

撫州邂逅彥正提刑道舊感歎

憶在昭文並直廬與君三歲侍皇居
花開輦路春迎駕日轉蓬山曉曝書
學士南來尚富穴神州北望已邱墟
愁逢符節滄江上握手秋風淚滿裾

六月二十一日子文待制見訪熱甚追記館中納涼
故事漫成一首

鳳閣西頭千步廊與君長夏對胡牀
陰陰檜色連宮草寂寂基聲渡苑牆
細雨分茶紋簟冷明珠擘炙小荷香
身今老病投炎瘴最憶冰盤貯蔗漿

頃年侍立集英殿見周表卿唱名第二客居臨川表

卿爲宜黃丞歲滿訪別作詩送之

往時束帶侍明光曾看揮毫點御牀只道驂駟已騰踏不知鵬鶚尚摧藏官居四合峰巒雨驛路千林橘柚霜莫爲艱難歸故里漢庭今重甲科郎

爲亞卿作

君住江濱起畫樓妾居海角送潮頭潮中有妾相思淚流到樓前更不流

淮上書事

平楚盡積水長淮多奇峰蕭條月曜夜浩蕩風鳴冬客行未可歸弊裘那得重寒氣搜病骨清潭貌衰容遠遊有滯念將老無懽悰故國渺萬里去此嗟誰從

入鳴水洞循源至山上

崇山蓄靈泉萬古去不息
潄爲百斛深散入千渠溢其東
漚民田又北尋山腋斷崖如破瓜
飛瀑中蕩激大聲或雷霆細者亦
淅淅末流盡半山十里見沸白得
非拖天紳常恐浮地脈呂梁丈人
老尚與汨偕出我欲踟驚湍下窮
巖礮石惜哉意徒然屬此歲凜凜
安得汝南周斷取白蛟脊歸之龍
泉峰山門夜喧席

飲酒次人韻

淺瀨見魚遊澄潭知鶴沒疑乘青霞珮
徑墮白銀闕平生探學海中年悟禪悅
應須臨渺瀰庶以稱超越回塘大圓鏡
新蒲細於髮綠扇互低昂玉顏爭秀發
良辰宴觴豆炎

職脫巾襪荷聲過急雨竹影敷涼月緩行躡芳草移坐蔭
深樾何常酒拍浮恣聽舟搖兀而我方抱鉛上馬自腰笏
叩門不問呼造席無乃咄詎敢陵崕崕幸許窺胡牖願公
開迷雲令我入理窟雄篇出月脇妙思露天骨蹇步那由
追胥非媿先竭

武寧道中

小灘嘈嘈大灘惡朝行羊腸暮鹿角盡日拖舟不得前忽
然筴斷千尋落上梁左側石子多兩船與石鳴相摩臥聽
溪師倚篙哭將如四十二灘何

羊腸鹿角上梁皆灘名

夜與疎山清公對語因設果供戲成長句

落葉屑窣鳴風廊四無人聲夜未央道人過我談真常客

舍有底相迎將竹鑑篝火曲木牀烏柏爲燭楓脂香青梨
纍纍飢坐光黃甘十子近著霜醯梅蜜杏經年藏紅糝綴
枝加柘漿尊藕諸芋蕸荷薑堆盤滿案次第嘗憶初見翁
修水旁轉頭八十鬚眉蒼爾時尊宿略喪亡屹如樅檜老
不僵而我昔漫參朝行十年投閑坐老狂人生一夢炊黃
粱諸法本閒人自忙況今世故甚擾攘與翁幸憇菩提坊
夜闌一酌餘甘湯它年此樂不可忘

泰興道中

縣郭連青竹人家蔽綠蘿地偏春事少山迴夕陽多暗木
披崖出輕船掠岸過傳呼細扶杖吾老怯風波

次韻何文縝舍人後省致齋

夜直沉沉浴殿南春風想對百花潭
藤牀轉枕尋餘夢粉壁題詩倚半酣
追記舊游時一笑歡參真理莫多談
白頭初試絲綸毛歸去扶犁意亦甘

次韻侯思孺將至黃州見簡

未用船頭報水程爲君持酒打愁城
青山久負當年約白髮多從客路生
點檢轉工新句法揩磨難減舊風情
小留莫道無供給一味東籬有落英

謝人送鳳團及建茶

白髮前朝舊史官風鱸煮茗暮江寒
蒼龍不復從天下拭淚看君小鳳團

送張右丞司赴召

老夫宴坐臨川寺五見君爲萬里行病馬不辭遭掣頓雲
鵬那復計期程遙知此去常乖隔莫惜書來訪死生早與
朝廷定巴蜀故山遲暮欲歸耕

辛亥膺

次膺字起季萊州人政和二年進士南渡寓家浮
梁孝宗朝累官同知樞密院事資政殿學士提舉

洞霄宮

題使宅眉壽堂

多病相如欲倦遊四年紆綬到三州君恩乞與歸巖壑何
嘗將軍得罷休

余安行

安行字勉仲德興人累舉不第以經學稱有石月

老人集

龍游舟中遇立冬

大觀戊子同應求至京口予赴試南京

挂帆朝發龍游浦天寒正下瀟瀟雨聞說人閒今日冬連
檣處處歡相語我今與汝共孤舟寂莫舟中任水流人生
自適乃爲樂莫把閒腸生寸愁

江西詩徵卷十二